

25 AUG 1998

Mahathir-cabar

PEMBANGUNAN ADALAH HASIL USAHA KERAJAAN DAN RAKYAT, KATA DR MAHATHIR

SHAH ALAM, 25 Ogos (Bernama) -- Datuk Seri Dr Mahathir Mohamad hari ini mencabar sesiapa yang mengatakan pembangunan Malaysia adalah hasil nasihat dan bantuan dari luar supaya membuktikan dakwaan mereka.

Perdana Menteri berkata Malaysia sekarang terkenal sebagai negara yang termaju di antara negara-negara membangun di dunia hasil usaha kerajaan dan rakyat.

"Saya mencabar sesiapa yang berkata pembangunan Malaysia adalah hasil nasihat dan bantuan orang luar," katanya pada majlis Perjumpaan Bersama Rakyat di stadium tertutup Malawati Shah Alam di sini.

Biarpun Malaysia ada membuat pinjaman dalam usaha membangunkan negara namun jumlah yang dipinjam itu tidak banyak dan ia dibayar lebih awal daripada jadual, katanya.

Beliau berkata tindakan kerajaan melaksanakan projek-projek besar sebelum kegawatan ekonomi pada paras RM2.50 bagi US\$1 membuktikan kebijaksanaan kerajaan.

Katanya walaupun tiada siapa yang menjangkakan kegawatan ekonomi akan terjadi tetapi langkah pembinaan projek-projek besar sebelum masalah itu menyebabkan banyak duit yang dapat dijimatkan.

Dr Mahathir berkata projek-projek yang besar yang dianggap sebagai mega sebenarnya dibina dengan kos yang kecil tetapi saiznya yang besar.

Beliau memberi contoh seperti pelaksanaan projek Lapangan Terbang Antarabangsa Kuala Lumpur (KLIA) yang bernilai RM9 bilion atau kira-kira US\$4 bilion (kadar sebelum kegawatan ekonomi) berbanding dengan lapangan terbang baru Hong Kong yang berharga US\$20 bilion yang merupakan satu persepuluh besar KLIA.

Begitu juga dengan pelaksanaan kompleks sukan Bukit Jalil yang bernilai RM2 bilion atau US\$500 juta, katanya.

"Saya cabar mana-mana negara yang boleh membina semua itu (Kompleks Sukan Bukit Jalil) dengan harga US\$500 juta. Tentulah kita bodoh kalau kita tidak buat semua projek itu semasa ekonomi kita kukuh dan nilai ringgit kita tinggi," katanya.

Dr Mahathir berkata dunia sepatutnya mengkagumi pencapaian dan kebolehan negara ini.

"Tetapi sebaliknya mereka ingin menghancurkan ekonomi negara dengan menekan nilai ringgit dan harga saham sehingga kita mengalami masalah ekonomi," katanya.

Bagaimanapun, katanya, dalam menangani masalah ini kerajaan bersikap pro-aktif dan tidak akan menunggu hingga rakyat menderita dan merusuh seperti di beberapa negara lain.

Kalau dibiarkan, rakyat akan menghadapi tekanan ekonomi seperti di Indonesia, Thailand dan Korea Selatan, katanya dan menambah, "sebab itu saya terpaksa membuat penjelasan ke seluruh negara supaya rakyat sedar tentang kegawatan ekonomi walaupun mereka masih hidup dalam keadaan aman dan makmur sedangkan negara ini boleh menghadapi bahaya daripada tekanan spekulator matawang."

Katanya ada pihak asing merasa kecewa kerana Malaysia masih dapat mempertahankan keadaan tanpa perlu menyerah kepada Tabung Kewangan Antarabangsa untuk mendapatkan bantuan.

Perdana Menteri berkata: "Kita tidak akan serah kepada IMF, saya yakin rakyat ingin mendaulat dan mengekalkan kemerdekaan dan kebebasan negara. Justeru itu, kita akan memulihkan keadaan dengan cara kita sendiri."

Beliau sekali lagi mengingatkan rakyat betapa pentingnya mereka terus bersatu-padu merapatkan barisan dan menyokong kerajaan dalam usaha memulihkan ekonomi.

Dr Mahathir juga berkata Malaysia tidak memerlukan nasihat orang asing termasuk majalah asing cara mana untuk memulihkan ekonomi negara.

Beliau berkata, mereka tidak perlu datang memberi nasihat kepada kerajaan.

"Kita tidak perlu nasihat mereka sebab mereka buka jenis manusia yang tahu belas kasihan," katanya.

Beliau menyebut mengenai laporan akhbar The Times London yang mengecam spekulator matawang George Soros yang bertanggungjawab memburukkan keadaan ekonomi Rusia.

Antara isi kandungan akhbar itu ialah sepekulator matawang perlu "ditendang keluar".

Mengenai harga barang keperluan, beliau berkata walaupun mata wang negara telah mengalami kejatuhan 60 peratus namun harga barangan naik kurang daripada 10 peratus.

Beliau juga memberi jaminan bahawa barang-barang keperluan seperti gula, tepung dan susu tidak berkurangan di negara ini tetapi harganya mungkin naik sedikit.

Pada majlis itu juga Menteri Besar Datuk Abu Hassan Omar menyerahkan cek bernilai RM2.25 juta kepada Dr Mahathir untuk Dana Khas Negara.

-- BERNAMA

ARA WAT